

Kálag e'só echě Paalε áténlé Timotiε Ndibned ní kálag

Timotiε abédé kódemod echě endúbé Krístæ. Ambíd á Esia Maino. Nyaá abédéε mmwaád a Israel, sáá-'ε mod a Grikia. Ahõñné'áá Paalε ábelé-'ε nsón ní Dyõb ne mó. Kálag e'só echě Paalε áténlé Timotiε ekoo' metón méláán ahób.

Dyam dé'só, ene kálag esíme bad etúu áte átéd pónde ne ayáge dé metóm áde abédé á mwembé-te. Adén ayáge dênladtén mekan míme bad bé Israel béhídé'áá ne míme bad ábe béesě bad bé Israel béhídé'áá. Adê ayáge abédé nén bán nkõñsé míme bad bédíí áte níde ebébtéd, bán nzé mod ákũd-te e'soosõñ átãñgéné abíí mekan mé e'koñnéd ábelé-'ε mekan nêñgáne ákii donge á ndyééd ne ádyεε ésebán mod awóó' mmwaád ké'ε mmwaád awóó' nchóm. Enén kálag ehóbe ámpē ngáne bad bétãñgéné mwembé alyáged, ngáne bétãñgéné Dyõb edúbé abε, ne nyaa e abé echě bad ábe bélyágte mwembé ne ábe béwõngan á mwembé-te bétãñgéné awõñ. Asóged, Paalε alébe Timotiε ngáne átãñgéné mbaledε awe Yesu Krístæ a bwám abé ne nsón míme átãñgéné abel áfintê e bad ábe bédúbpé Krístæ.

Nkabtéd ní kálag

Ndibned ní kálag *1.1-2*

Elébé tãñgene mwembé ne bad ábe bélyágte mó
1.3-3.16

Timotiε akudé elébé tãñgene míme nsón *4.1-6.21*

Paale alómmé Timotiē melēnten

¹ Mē Paale, mē-εέ ntelé enén kálag. Nđii mbapεε a nlómag awě Yesu Krīstəə. Nđake echě nkúdé ábel nímē nsón ehúú ne Dyöb, mó awě asoo syánē áyāl e mbéb, ehúú-’ε ne Yesu Krīstəə, mó awě adé syánē e’lyág bé nlém. ² A-Timoti, wε-εé rítenléé enén kálag. Edíi nēngáne awem mwān mwēn, adúbe áde édúbpé Krīstəə. Nsimé, ngəl ne nsaj níme ríhúú ne Dyöb Titée awêd ne Yesu Krīstəə, Sāngwée awêd mbê ne wε.

*Paale alébe Timotiē tângene
bemeléede bé metóm*

³ Ade nkágé’áá á mbwóg e Masēdonia menláá wε mēé élyæg hē á dyad dé Efesus ábel bonj weémwāg wεé donje á bad béyágte’ ayáge áde déetāngene. ⁴ Weémwāg-ke-se ábê bad bébēbtē pónđé ákal póle éche éesě mbále ne póle éche éhóbe tângene ábāb betaa ábe mod éehelée-se atónj. Nzé béyágte échē ndín é póle épeene mpentēn, éewōngānnē bad áwónj alongé áde álúmte bán bédúbpé Dyöb. ⁵ Nzom echě enkāñ bonj nláá wε mēé éyágte bad ayáge áde átāngéné edíi ábel bonj bad bédāñ nhóg ne aníní. Etāngéné edāngē awónj éche ébide’ á nlém níme rísáá, nlém níme mbíí dyam áde átāngéné ne áde déetāngene, mbíí-’ε adúbe áde áde mbále. ⁶ Donje á bad béehidēē nímén mekan, nē ábelé bepáné nzii ahób áde béhóbéé e’kúkú é’ mekan. ⁷ Abê bad béwóó nlém áte ábé bemeléede ábe béyágte mbéndé é Dyöb bonj béēsōñtenéé mekan níme belāngéé bad, béēsōñtenéé-’ε mekan níme béhóbéé bán békóó abíi.

⁸ Debíí nén bán mbéndé eboó nzé bad bébenlad chó ngáne éhednad-té. ⁹ Debíí’ε nén bán Dyöb

déebeléé mbéndé áyāle bad ábe bébele' ngáne áhedéé. Boŋ Dyōb ábélé mbéndé áyāle bad ábe béēhídē mbéndé ne bad ábe béebelé' ngáne áhedéé. Abélé mbéndé áyāle bad ábe béewóo Edāádəŋ é Dyōb áte, ne bad ábe bébele mbéb. Bébélé mbéndé áyāle bad ábe béewóo mbwóg ní Dyōb áte, ne ábe béhóbe Dyōb mekan mé mbéb áyāl. Dyōb ábélé mbéndé áyāle bad ábe béwúé' ábab besáá ne benyaá, ne bad ábe béwúé' bad bémpeē. ¹⁰ Bébélé mbéndé áyāle bad ábe békábe mesón, baachóm ábe bənaŋnad baachóm bémpeē, bad ábe békóbe bad boŋ bésóm bó nēē betāŋ, bad ábe békale metóm, bad ábe bémwāg melě mé metóm á póndé e nkáásé ne bad ábe bébele' kéchéé éche éesě nchoo ne ngáne ayáge á bwām áhóbéé. ¹¹ Adé ayáge ádé nchoo ne nkalaŋ ní bwām níme Dyōb ábágé me ákale bad. Mmē nkalaŋ ní bwām níhúú ne Dyōb dé ehúmé áde bad békeneé.

Nságnen áyāle ngəl e Dyōb

¹² Nságnan Yesu Krístəə, Sáŋgwéé awêd, mó abage me ngíne ábel nímmém nsón. Nságnan mó áyāle anyín áde ányíné aá mēbēl mó nyaa eche etəŋgéné, ápwēd-te me ábele mó. ¹³ Ambel nē, kénéé édíí bán ngen e'só nhóbé'áá mó mam mé mbéb áyāl, nítagté bad ábe bédúbpé mó, níbenlád-te e'yale bé mbéb áyāl eché. Boŋ Yesu Krístəə anwóg me ngəl áyāle menkēmpaá adúbe awóŋ, menkēmbíí-'aá chōm éche mbeléé. ¹⁴ Sáŋgwéé ambě me nímmē nsimé níme méesě ahəgtən, ábēl ndúbé Krístəə, ábēl-'e aá nílúmed bad bémpeē edəŋge áyāle dedé nhóg ne Yesu Krístəə. ¹⁵ Yesu

Křistəə ampě a nkōŋsé âsonj bebel bé mbéb. Mmēn-ne mbédé mod awě atómtánnáá mbéb abel tómaa moosyáál. Enén póle edé mbále detəŋgéné-'ε chó akonj dé adúbe. ¹⁶ Bonj Dyōb dénwōg me ngəl áyāle ahedé'áá aá Yesu Křistəə álúmed aá mímē nwesən méewóó'é asóg áyāl e me awě ntómtánnáá mbéb abel tómaa moosyáál. Nén dēmbenléd nēŋgáne eláŋsén wée bad ábe bédūbē, békūd-te alongé áde déemaá'. ¹⁷ Ehúmé ne edúbé bēbē ne Dyōb á ngíndé ne á ngíndé. Mó adé kəŋ echē edé á ngíndé ne á ngíndé. Mó-'aá adé ane awě bad béenyinnēē đíd awě eewág-ke. Mwěmpen-εé áde Dyōb. Ebē nē.

¹⁸ A awem mwān Timoti, mekan míme rílángeé wε meé ébel, méđii mekan míme Dyōb dénlā'á'é bad aá béhōb bán mébenléd áyāl echōŋ. Abē e'yale é'wēd wε áte. Abenled áde ébenladte ayáge á mbále é'bel wε ébē nēŋgáne mod awě awane nzum bwām. ¹⁹ Enyín-ne nén wεé móchəŋnēdē ne adúbe áde édúbpé Křistəə, ébele-'ε mekan bwām ngáne nlém rílánge wε. Donje á bad béebeléé ngáne mímab nlém nlánge bó. Nén ákáká béchénné ádab adúbe béebíi'é wée békagké. ²⁰ Atíntē e bad ábe ríhóbéé nē, nhóg adé bán Himenosε, aníní-'ε bán Alesandaa. Abén bad ntědté bó á mekáá míme Satanε ábel bonj bēbii nén bán éeboo'é áhób Dyōb mekan mé mbéb á yāl.

2

Elébé tŋŋene ábe Dyōb edúbé

¹ Dyam dé'só, nwéde wε aláa nén meé nyékānnad moosyáál. Nyékānnad bad bémpēe. Nyékānne nén bán Dyōb álóme nyé bwēm ábe nyétógnéné, nyéságnan-ne mó áyāle mbonj míme

ábenléé nyé ne bad bésyāāl. ² Nyékânnad kâη é bad ne bad bésyāāl ábe bédé á nkamlen. Nén débēl alongé áde syánē débē nsan ésebán mehób médé, débélé ngáne Dyöb áhede, débagé-’ε mó edúbé á menzii mésyāāl. ³ Akânned bad ábóó. Nén áwógte Dyöb ádé ásóó syánē menyinge. ⁴ Dyöb áhede aá moosyāál ákud e’sóoson básōnten-ne mbále echē Eyale é Dyöb ékalé. ⁵ Ebyééné nén bán Dyöb ahóg dēmpen dōó adé. Mod nhóg mwēmpen-naá adé awē apene Dyöb ne baányon á nchemten. Ane mod adii Yesu Krīstā. ⁶ Ambě adē alongé áwé á nló mí moosyāál. Ene kwééd echē awédé á nló mí moosyāál enlúmed á pónde echē etāngéné nén bán Dyöb áhede aá moosyāál ákud e’sóoson. ⁷ Ayāle nén dōó ákээ bon Krīstā álōmē me nēe mbaee a nlomag áke dé akal nímē nkalan tēngene adúbe á Krīsto ne mbále, wēe bad ábe béesě bad bé Israel. Dyam áde ríhóbéé adé mbále. Meékālēē metóm.

⁸ Né-óó hōm ké áhéé adé bad bé Krīsto béladnéé, nhede nén méé baachóm ábe bébágé échab yāl ábele Dyöb bényene mekáá ámín bébage mekáne. Abé bad béētāngeneé melingá ahé á nlém káa béētāngeneé bad abé ábe básenle’. ⁹ Nhede-’ε ámpē nén méé bebaád béhâg mesan nímé bad bényinnē nén bán métāngéné. Mmāb mesan métāngéné bó yāl akúten bwām ésebán métēde baachóm nlém á abum. Béenabpé esid é nló nyaa echē etómé áte, béēhāg bwēm é’ gól, béewāā’ nsan nímé bébénlé bán bé meláá mé etógnén, béēhāg-ke mbóté éche étómténé nkun abé. ¹⁰ Bon pen nímāb mbeltéd mí bwām rílúmed nén bán bédii bebaád ábe bébenle Dyöb. ¹¹ Mmwaád atāngéné ádyēē piib, ásūdēd yāl bon áwōglān ngáne baachóm

béyágtéé. ¹² Meehóbeé nén mæé mmwaád awóó kunze áyáged káa ákamlen baachóm. Mmwaád atáŋgéné ádyēē piíb. ¹³ Nhóbé nén áyāle Dyōb dénsēbē Adamε ahəg boŋ áhəgé' Ifε. ¹⁴ Ebyééné-'ε nén bán mmwaád móo Satanε ândogké boŋ abóó mbéndé, saké Adamε. Né-óó mmwaád móo ambóó mbéndé. ¹⁵ Boŋ Dyōb désōŋ alongé dé mmwaád á póndé e achád nzé adii asumé nlém wéε Krístə alúmté-'ε edəŋge ne bad bémpēe, eewóo-'ε atón dé mbéb ké ahóg áyāl.

3

Paale atēnlé Timotiε t̄ŋgene belyáged bé mwembé

¹ Nzé mod ahεde aá móbê nlyáged a mwembé, né apwεdé kase e nsón. Enén póle edé mbále. ² Bəəb-pəó, mod awe alyágte mwembé, atáŋgéné abé mod awě bad béehōbēē mekan mé mbéb á yāl, atáŋgéné-'ε dásō mmwaád nhóg awon.* Abé mod awě akóbe yāl, abé mod awě adole dyam áte bwâm, abé mod awě adělté yāl áte, abé mod awě akobe beken, abé-'ε mod awě abíε bad ayáged. ³ Eebág mod awě abagé yāl á amwé á m̄im, káa mod awě apεene epuutéđ. Boŋ ábê mod awě apwiítédé, ábê-'ε mod awě eésenlé'. Eebág mod awě atómténé mənέ adəŋ. ⁴ Atáŋgéné abé mod awě acháŋgé eche ndáb bwâm, ábōŋgē-'ε ábe bán nyaa eché béwógnεé móo bébage-'ε móo edúbé á menzii mésyāł. ⁵ Nhóbe nê áyāle nzé mod eéhele eche ndáb akamlen, chán-nō áhēnlé mwembé ní

* **3:2** Atáŋgéné-'ε dásō mmwaád nhóg awón káa atáŋgéné dásō mwaád awon ngen póg ne ngen ésyāł káa mod atáŋgéné dásō mwaád mwēmpen ananjed.

Dyöb akamlen? ⁶ Eetângeñeé se abé mod awě adúbpé Krístæ ekóólé ekóólé. Esebé nê, né åbē kúmbe, ch́ ẽbẽl ákwε, ákũd-te nkógsen melemlem ngáne Satanε ánkweé boŋ ákũd-te nkógsen. ⁷ Abád ámpē, ane mod atângeñé abé mod awě káõne bad ábe béesě á mwembé bébageé edúbé. Nén dẽbẽl éekudté akwágkẽ éehũn-naá melám míme Satanε áhíínedé ḿ.

⁸ Bad ábe béwõgan ábel nsón á mwembé, ébê melemlem née b́. Bétângeñé abé á bwám awõŋ, bébé-'ε bad ábe béhóbe dyam ne nlém nhóg. Béetângeñé bad ábe ábê bébágé yãl á ámwé á mĩm, káa bad ábe bédé metog áyãle mone. ⁹ Bétângeñé béhíd mbále eché Dyöb ábeleé boŋ bad bébí tãŋgene mewẽmten míme áhedéé aá béwõŋ ne abé áde áhedéé aá béwõŋ. Bétângeñé bébel nê ne nlém míme míbí chõm éche étãŋgeñé. ¹⁰ Belyáged bédẽhób bán bẽpwede bad ábe béwõgan á mwembé-te, bétãŋgeñé bad ábe béhedéé apwẽd asebe dé asimẽn. Nzé bényíné nén bán mod awě bésímné eewóó'é awusé ké ahóg á yãl nê ane mod akwõgnedé ábel mímê nsón. ¹¹ Káõne ábãb bebaád bétãŋgeñé abé á bwám awõŋ. Béebãg bebaád ábe béhóbe bad ámbíd, bébê bebaád ábe békóbe yãl, bébé-'ε bebaád ábe bad béhele-se bésũm nlém á yãl ne kéchéé éche bébeleé. ¹² Mod awě awõgan ábel nsón á mwembé atãŋgeñé dásõ mmwaád nhóg awõŋ. Atãŋgeñé abé mod awě abõŋge ábe bán ne bad bẽmpẽe ábe bédé áwe ndáb bwám. ¹³ Nhóbe nê áyãle nzé bad ábe béwõgan ábel nsón á mwembé bébele nsón bwám, bad bébe b́ edúbé. Nén dẽbẽl béwõŋ nlém áhób tãŋgene adúbe áde bẽwóó ne Yesu Krístæ.

Dyam dé e'koṅnéd áde dēntīm abyên

¹⁴ A Timoti, kénée édíí bán nwóó nlém ápe áwōṅ mwämpīn pón dé, ndii ntenle wε enén kálag.

¹⁵ Ntenle wε nímén mekan míme étāṅgéné abel ábel nén ké meélyoge ape, ehéle ebíí nyaa e abé eché bad bé Dyōb bétāṅgéné awáale. Bad bé Dyōb bóó bédé mwembé ní Dyōb, Dyōb ádé-'ε á alonḡé. Mmé mwembé móó rídé nēṅgáne akon ne nsáaned míme ríchāṅgé mbáale Eyale é Dyōb bwām. Ahed dó-'aá ene mbáale ébwógnédé. ¹⁶ Dyōb ábélé syáā debíí nén bán nímē nkalan ndé etógnén bwāmbwam. Ndé nén bán:

Krīstæ ampě, abé-'ε moonyon,

Edæádæṅ éche Esáá énlūméd sé nén bán adii Mwān a Dyōb,

ángel-ε ényīn mó.

Bēnkálé bad bé nkōṅsé bésyāāl, bēndūbē-'ε mó.

Dyōb dēmpuúd mó ákē-'ε ádyōb ne ehúmé ésyāāl.

4

Paale alébé Timotiε tâṅene bemeléede bé metóm

¹ Edæádæṅ éche Esáá énhōb bwām nén aá, nímén mesú donḡe á bad bétédé adúbe á mbáale ádāb, bédūbpē bad ábe báyáḡte ayáḡe dé metóm. Adén ayáḡe dōó e'dæádæṅ bé mbéb é'hedεé aá bédúbe.

² Abén bad bébele' byánán békale mbáale bon metóm móó békaleé. Nzé báyáḡte chōm éche éetāṅene bélūmte nén bán béebii'ε nḡāṅlén áfinté chōm éche étāṅgéné ne éche éetāṅene. ³ Abén bemeléede bé metóm, báyáḡte bad bán béewōṅné, bán bad béedyāḡ-ke donḡe dé medyé. Dyōb dēnhāḡ nímē medyé ábel nén bad bedyāḡ mó. Bad ábe bébíí nkalan ní bwām, bédúbpé mó,

béságnanne Dyöb áyāle nímê medyé. ⁴ Abê be-
meléede béētāηγενεέ, áyāle kéchéé éche Dyöb
áhágé ébóó. Nzom ké póg eesaá ábán donge dé
medyé. Né-ᵛó, déságnen Dyöb akud áde dékudεé
ábén bwēm. ⁵ Mod eékīē ndyééd, áyāle Eyale é
Dyöb ne mekáne bébele chó ébon adyé.

*Paale aláηgé Timotiε
ngáne átāηgéné mbaledε
a bwám awe Krīstəə abé*

⁶ Nzé eyágte bad ábe bédúbpé Yesue nímén
mekan né wēbē mbaledε a bwám awe Yesu Krīstəə.
Wéwēdnēd-te áte á edəádəη-tē áyāl e nkalanη níme
édúbpé ne áyāle ayáge dé eyale é Dyöb áde éhídεé
ámííd. ⁷ Weewóó dyam dé abelen ne pále éche
élúmte bán bad béedúbpεé Dyöb, ne e'yókél é' pále.
Bon pen éyágke' póndé té ábel ngáne Dyöb áhedεé
aá ébel. ⁸ Edé etógnén mod áyáged yāl e nkōηsé,
áwéd chó áte. Bon étómténé etógnén abé nzé
mod awédé yāl áte ábel ngáne Dyöb áhedεé áyāl e
chōm ésyāāl. Débel ngáne Dyöb áhedεé áyāle, Dyöb
áhóbé aá mósᵛbē syánē alonḡé áde déemaá', bᵛᵛb ne
á póndé echē ehúε'. ⁹ Adén dyam áde nḡóbé nén
ádé mbále. Nyētāηgéné dó adúbe. ¹⁰ Né-ᵛó, nén dᵛᵛ
ákáá bon dényᵛdé, déwanté-'ε yāl áte áyāle delyágé
nlém ne Dyöb áde áde á alonḡé. Mó abage baásyāāl
e'soóson, bwāmbwam bad ábe bédúbpé mó.

¹¹ Nyín nén wεé mólāηgē bad ábe bédúbpé nímén
mekan, wεé mýágtē-'ε bó mó. ¹² Weémwāg-se
modmod anyín wε nkóηtéd áyāle édíí kódemod.
Bon pen lúmed bad ábe bédúbpé abé a bwám ábel
bon bómpē bébel melemlem. Nyaa echē éhóbεé
dyam, abé áde éwóó, nyaa echē édáá bad, nyaa

éche édúbpé Dyöb ne abel áde wéebeléé mekan mé mbinde ábê née elánsén wée bad ábe bédúbpé. ¹³ Enyín nén wée mólāa' Eyale é Dyöb nzé bad béládné á mwembé-te. Elánge bó chóm éche échê Eyale é Dyöb éhóbéé, éyágte-'ε bó kááη né mpedé. ¹⁴ Weétedté nsón míme Dyöb ábágé wε née ndε, áláa bad mekan míme Dyöb dénhōbpē aá éláa bó á pónde eche belyáged bé mwembé bémbānnē wε mekáá á nló. ¹⁵ Belé mímén mekan ne nlém nhóg ábel bon baásyāal bényín nén bán ebεle mó bwām, ekεene-'ε mó á'sō. ¹⁶ Etōη yāl acháa bwām ne kéchéé éche éyágteé bad. Kεené' nē á'sō, ábel bon Dyöb áson wε alongé, ásōη-'ε alongé á bad ábe éyágteé.

5

Paale alángé Timotiε ngáne átáηgénε donje á bad acháa á mwembé-te

¹ Weekánné mod a mbáá áte. Cháá mó melem ngáne ehεe-se echáá sóó mwēn. Cháá bad ábe béepede wε kōd née baányonη bé baachóm. ² Cháá bebaád bémbáá nēηgáne éhεléé-se echáá nyoó mwēn. Echáa-'ε ngōndéε née baányonη bé bebaád. Weewōηné bó mekan mé mesón á mewēmtεn.

³ Bekúd ábe béewóo bad ábe bēnōne bó éwōηgan bó. ⁴ Bon nzé nkúd achyáá bán káa bán ábe ábē bán, bétáηgénε mó atōgen. Nén ádé dyam dé'só áde bad ábe bébεle ngáne Dyöb áhedéé bétáηgénε abel. Abāb benyaá ne besáá bēntōgén bó, bómpē bétáηgénε bó atōgen. Nén áwógte Dyöb menyīnge. ⁵ Nkúd awē adé mwēmpεn bon eewóo mod awē awōηgan mó, wée Dyöb dēmpεn dōo ályágeé nlém. Abē ákānne', áhedne-'ε mó nwōηgen nkuu ne

mũte. ⁶ Boŋ nkúd awě asólté yǎl á mekan mé nkõŋsé, awédé á edæádæŋ, kénéé ádíí á alongé. ⁷ Láá bad bé mwembé rímén mekan ábel boŋ mod eehóbé bó mekan mé mbéb á yǎl. ⁸ Nzé mod a Krĭsto eétõgné bad bé túmbé ábē, bwāmbwam áde abum a ndáb, né alúmte nén aá móodúbpeé Krĭstæ. Ene ndín e mod rímē mbeltéd nílúmte nén bán adii mod awě abelé mbéb tómaa mod awě eedúbpe Krĭstæ.

⁹ Nkúd awě éhele-se etóŋ weé atáŋgéné nwõŋgen akud, adii nkúd awě atómé móom mé mwě ntóób. Atáŋgéné abé-’ε nkúd awě a nwóŋ nchóm nhóg mwěmpen. ¹⁰ Ane nkúd atáŋgéné abé mmwaád awě bad bényíne bán míme mbeltéd míbóó. Atáŋgéné abé mmwaád awě apeéne bán ámĭn bwām, abé mmwaád awě akobe beken awe ndáb bwām, abé mmwaád awě asudte yǎl, ábenlé bad bé Dyõb nyaa echě áwóbpé’áá bó mekuu. Atáŋgéné mmwaád abé awě awóŋgéné bad ábe bémbē á ndutul-tê, ábē-’ε eche yǎl ábel mekan mé bwām. ¹¹ Boŋ weetóó bekúd ábe bédé etum nêŋgáne bekúd ábe békud nwõŋgen. Weetóó bó áyāle nzé béwóó esíí áwóŋ bechóm ámpē béebeléé Krĭstæ ngáne éhednadté. ¹² Nzé béwóó-’ε bechóm bémpēe né békwógnédé ákud nkógsen, áyāle béelõntéé akag áde bénhēē nén bán bébelé Krĭstæ. ¹³ Saá-kaá nê dēmpen, béwóó abé áde béebeléé chõm, béhyóme ndáb ne ndáb. Amĭn enê béhóbe bad ámbíd, béhāg nsəl áyāl e mekan mé bad, béhóbe-’ε mekan míme bénkěntáŋgěnné ahób. ¹⁴ Né-õó, ndæá mēé e’tum bé bekúd béwóŋ bechóm, béchyáa bán, bébõŋge-’ε échāb ndáb. Nén débēl béebeléé mekan mímé bad ábe békóó syánē béhōbēē

syánē mekan mé mbéb á yǎl. ¹⁵ Nhóbe nén áyāle ábén bekúd donje bébóótédé mekan abel míme Satanε áhεδέε áá bébel. ¹⁶ Mmwaád ké ahée awě adúbpé Krístəə awě awóó bekúd áwē abum á ndáb, atánǵéné bó atóǵen, saké nén bán ápêmted mwembé mímē nted. Nén débǔ mwembé etál ábóo bekúd ábe béewóo bad ábe bébónge bó.

¹⁷ Mwembé mβε bad bémbáá ábe belyáǵte bó bwâm edúbé ne nsábe, bwâmbwam ábê belyáǵed ábe bébele nsón mé akal ne áyáǵed Eyale é Dyǒb. ¹⁸ Edé nê áyāle éténlédé á kálag e Dyǒb nén bán, “Weetádé nyag nsəl eche esálte ngun.” Eténlédé ámpē nén bán, “Bebel bé nsón bétánǵéné mímab nsábe akúd.” ¹⁹ Weedúbpé mekan míme bad béhóbεé belyáǵed bé mwembé áyāl, éetómεé né mbónj éβε káa éláán étyéémé nén bán nê ádé mbále. ²⁰ Nzé mod ámbáá a mwembé abelé mbéb, káné mó áte á’sō é’ mwembé ábel bonj bad bémbáá bémpēe bébánj mbéb abel. ²¹ Nlánǵe wε á’sō é Dyǒb ne Yesu Krístəə ne á’sō é ángel éche épwédnédé mée ébel chǒm eche étánǵéné abel, ésebán ekwognad modmod. Weétímē-’ε modmod ambíd. ²² Weewámsán mod mekáá abán á yǎl áwóǵed mó mod a mbáá a mwembé. Nzé ebelé nê bonj ane mod atímé mbéb abel, ne wémpē ebelé mbéb. Mmǒj weébēlē mekan mé mbinde. ²³ Weemwág mendíb mwēmpen ámpē. Mwág mwǎ mím ábel nén abum áde ákwaglan wε áte pónǵé ésyāāl ámaa.

²⁴ Donje á bad bébele mbéb á nhéné míme moosyǎl ábíí, békāād-te bó. Abíníí-’ε bébele mbéb á mesǒm-tê míme bad béēbíí’é káǵj né béhéde áte. ²⁵ Melemlem nê dǒo donje á bad bébeleé

mboŋ níme níbyééné ne moosyáál. Bém̄p̄ē-’ε
béb̄ele mboŋ a mes̄om-té níme bad bēēbīi’ε káŋ
né bēhédé áte.

6

¹ Bad ábe bédé betāŋ bésyāāl bétāŋgéné
bébage bad ábe bédíi ásē echāb edúbé ábel
boŋ modmod eehóbé Dyöb mekan mé mbéb
áyāl, eehóbé-’ε ayáge ádēd mam mé mbéb áyāl.
² Betāŋ ábe bédé ásē e bad ábe bédúbpé Kr̄st̄ā
béwēmtān bán ngáne ábab besáá bédíi bad ábe
bédúbpé, béetāŋγενεé bó edúbé abε. Bétāŋgéné bó
abεle tómaa ngáne bēhélé’áá-sε bēbēlē bad ábe
béedúbpε Kr̄st̄ā. Bétāŋgéné ábel nē áyāle ábab
besáá ábe bēbenléé bédíi bad ábe bédúbpé Kr̄st̄ā
bébé-’ε bad ábe ábāb bembālede bédáá-’ε.

*Paale ahobe t̄angene ayáge dé
metóm ne nh̄on níme nt̄angéné*

Eyágte bad nímén mekan éwēd-te bó nlém
á abum áhíd mó. ³ Donge á bad bédé ábe
béyágte’ ayáge áde déetāŋgene. Adab ayáge
déesaá melemlem ne ayáge áde awεd Sāŋgú
Yesu Kr̄st̄ā áde ayágte bad ábel ngáne Dyöb
áhedeé. ⁴ Abē bad bélóné ne kúmbe, bēēbīi-’áá
dyamdyam. Nyaa echē ábē bad bédáá mpenten
mé e’yale ne nselag edii bó nēε nkole. Nén
áp̄εne kónjí áfinté echāb, áp̄εné mehób áfinté
echāb, bad bēhōbē-’ε baáb mehób mé mbéb
áyāl, bēwōŋnē nhóg ne aníníi mewēmtεn mé
mbéb. ⁵ Nén ábεle-’ε bēpentan pónde té nyaa echē
béehelée-sε bēbíi chōm éche étāŋgéné. Béehelée-
sε bésōŋtén chōm éche édé mbále ne éche éesē
mbále. Bēwēmtan bán nzé bēbenle Dyöb, né bēbē

nhən. ⁶ Boŋ mod äbē menyiŋge bwâmbwam nzé abele' ngáne Dyöb áhedeé nzé atéde-'ε aá kéchéé éche mówóó ékwógnédé mó. ⁷ Depedé á nköŋsé, deépeεneé chömchöm, nzé dewédé-'ε, déeswéénné chömchöm. ⁸ Né-óó, nzé dewóó ndyééd eche dédyāgkē ne chöm éche déhāgkē á yāl, né nê ákwógnédé syānē. ⁹ Boŋ bad ábe béhede nhən asud, bébelé béhún á mekəgsen-tê, bébé ngáne bad ábe békwdé melám. Bébelé béhedé mekan Abel híin níme mééboo ne mekan híin níme mééboŋne bó. Nén ábele bétage bwâmbwam. ¹⁰ Mod ké ahéé awě awóó nlém áte bwâmbwam ábud mənέ awón, abelé ábelé' e'bébtéd é' mekan ákud níme mənέ. Nê ábélé donge á bad bétédte ádube Krístə, békúde-'ε ndutul híin á nlém tê.

Paale abagé Timotiε elébé

¹¹ Boŋ wε, á-Timoti, mod a Dyöb, bán ábé e'bébtéd é' mekan. Nané mekan ámbíd níme métāŋgéné á'sō é' Dyöb, édəŋ bad, éwesən pónde ésyāāl, épwiited-tε. ¹² Wéd yāl áte ébê ésum nlém wéε Dyöb ébenle-'ε mó. Alongé áde déemaá' áde Dyöb ábágé wε, wéd dó achāned. Dyöb dēmbě wε áde alongé áde wénhōbpē á'sō é' bad híin wéé módūbpē Krístə. ¹³ Á'sō é' Dyöb, mó awě abage bwēm ésyāāl alongé, ne á'sō ábe Yesu Krístə, mó awě ankal mbále á'sō wéε Pontus Payledε, nlāŋge wε nén meé, ¹⁴ ébele chöm ésyāāl ngáne Dyöb áhóbé aá ébel, káəŋne pónde eche awed Sāŋgwéé, Yesu Krístə ápeé. ¹⁵ Apě á epun éche Dyöb Titée átíídé aá ápe, Dyöb ane awě ábē bad bébageé mekenag. Mwēmpen-naá adé Nkamlenε a mbáá a nköŋsé ísyāāl. Mó adé Kāŋ e kāŋ ésyāāl abé-'ε Sāŋgwéé a besāŋgwéé bésyāāl. ¹⁶ Mwēmpen-εé

awóó ngíne ábê á alongé á ngíndé ne á ngíndé, adé-
'ε á e'nyinεn bé ekíde ábe é'pene bwámbwam nyaa
eché modmod éehelée-se ápē benben. Mó adé ane
awé modmod éēnyīnēē mbéd, modmod eéhēlēē-'ε-
se anyīn mó. Edúbé ébê ne mó, ábē-'ε á nkamlen á
ngíndé ne á ngíndé. Ebê nê.

¹⁷ Síim bad ábe bédé nhon etúu áte nēn wεé
béekumé ekáá á tâl, béesumé-'ε nlém áyāl e nímāb
nhon, bwēm ábe é'maa', bon bésun nímāb nlém
wéε Dyöb. Mó adé ane awé abage syánē chöm
é'syāäl éche détógnéné ábel bon débê menyīnge.

¹⁸ Láá bó wεé bébele mbon áwóngen bad, ngáne
bad ábe bébúdé mōné awónj bábákgē nhon, mekan
mé bwām níme bébeléé mbê nímāb nhon, bēwōn-'ε
nlém áwóngen bad ne kéchéé éche Dyöb ábágé bó.

¹⁹ Nzé bad bébele nēn ébē nēngáne békóngé nímāb
nhon ádyöb. Nēn débē nēngáne nsáaned níme
nísúmnédé bwām ábel bon nísógtēn mekan níme
méhúε' á'sō ábel békud alongé dēn áde ákójté
alongé abé.

²⁰ A-Timoti, nsón níme Dyöb ábagé wε tón
mó acháa. Weewóó pónde ne mehób níme bad
béhóbεé níme méēwōngān ábe Dyöb edúbé, ne
mehób níme donje á bad béhóbεé bán chöm
ehóg édé mbále, bad bēmpēe-'ε béhōbē bán chöm
ēmpēe chōo édé mbále. Bon bó moosyāäl bébele
awusé nzé béhōbe bán, "Mε-εé ndé mod awe abíí."

²¹ Donje á bad ábe bēwēmtan bán bēbíí mam níme
médé, bon bēn béekoó'ε adúbe áde Dyöb á mbále
ahíd.

Nsimé n Dyöb mbê ne nyé moosyāäl.

Mel̃ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48